



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :



Tir Yimiyim



tir\_yimiyim



tir yimiyim

TAPAK 8

Karnataka nung Siddaramaiah-i  
Chief Minister menden toktsür

Singapore Open: Sindhu aser  
Sen na quarterfinals-i iogo



VOL. XXIII ISSUE NO. 225 (ADOK 225) DIMAPUR ROGONÜ (FRIDAY) MONUPII (MAY) 29, 2026

₹ 5.00

## Naga nunger arok tebilemstsü asoshi lokti balala lungjemer



Bodhbarnü Hotel Saramati, Dimapur nung Nagaland Tribal Hohos Coordination Committee (NTHCC) aser Eastern Nagaland People's Organization (ENPO) tsüngta tanaben shisadokden senden amendang tangokba noksa ka yangi angur.

**Dimapur, Monupii/May 28 (TYO):** Nagaland Tribal Hohos Coordination Committee (NTHCC) aser Eastern Nagaland People's Organization (ENPO) tsüngta tanaben shisadokden senden May 27, 2026 nü Hotel Saramati, Dimapur nung ENPO ajanga ayongzuka amen.

Iba senden ya Yimkhiung Tribal Council tir Throngso Yimkhiung mendenpuba aser Phop People's Council tatong tir N.T. Thamlong Phom tezülur ama mena liasü, kong Nagaland nung apex tribal bodies ajunga nungi shilem agia liasü.

Iba senden nung Naga nunger ka kuma lungjemtsüba dak sendakba ken o amena jemi aser telungjem adokdaksütsü, adianu ama aliba nung tashi itshitsü aser kati ka angatettepa, analitep nung arok mapa ama Naga nunger arok tebilemstsü bentetsü aser Naga nunger temeden, tejangraba wazüka ayutsü pangjemshia liasü.

Naga nunger arok ken o bushitsü asoshi arok sapang shidak ka matettet tashi Eastern Nagaland Tribal Hohos tema "NTHCC" nung anioktsü iba senden nung pangjema liasü.

NTHCC nungya Nagaland nung kin 15 - Angami, Ao, Chakhesang, Chang, Khamniungan, Konyak, Lotha, Phom, Pochury, Rengma, Sangtam, Sümi, Tikhir, Yimkhiung, aser Zeliang alitsü.

Iba senden nung Angami Public Organization tir Thejao Vihienuo ya Convenor, Yimkhiung Tribal Council tir Throngso Yimkhiung ya Co-Convenor aser Sümi Hoho tir Dr. Vihuto Asumi ya Secretary ama inyaksü shima liasü.

Iba senden nungsa Manipur nung aliba Naga nunger aser Kuki nunger tem dang yimjung pangzüng ka asoshi lenmang lapoktsü aser telok anaprong

dang tai maket nisungtem pua aliba memonui chiooktsü ayongzuka liasü.

Senden nunga Nagaland sorkar dang Government of India, Government of Nagaland aser Eastern Nagaland People's Organization tsüngta tripartite Memorandum of Agreement zülutepba tekeraba nung mapa kuma inyaksü asoshi ayongzuka liasü.

Bodhbarnü Dimapur nung NTHCC aser ENPO tsüngta shisadokden senden tanabuba mena lemtetba pela agizüker, ta Confederation of Nagaland Chamber of Commerce and Industry (CNCCI) ajanga sangdong ka nung ashi.

Iba senden nung pangzüng renemba ya telungem, adianu ama aliba aser Nagaland nung Naga nunger arok tebilemstsü benteta aotsü asoshi tongtipang aser otsüsütsü mera ka lir, ta ashi.

Apex tribal bodies ajunga sapang ka nung lungjemba ajanga Nagaland nung aliba Naga nungeri mapang talangka nungi aginüa aliba atalokba sayur, ta CNCCI-i ashi.

Iba ya ano lokti ka tentetba kisüng masü saka Naga nunger tali lungjemshitsü aser Nagaland nung arok ajungtsü asoshi tamang katempa bendanga agütsür inyakba temaitsü ka asütsü südi ta amanger.

ENPO-i akhangba aser aginüba asangsang akumtsü mapang talangka mali, anungji Nagaland nung aliba nüburtemi lungjemer Indo-Naga yimten ken o tajunglen nungi angatetteptsü asoshi inyaksü mapang tongogo, koba Naga nunger ajunga asoshi arok tebilemstsü tongtipangtiba lir, ta CNCCI sangdong ajanga ashi.

CNCCI-isa NTHCC dang pei taginüba aser tejangraba atema kisüng inyakba kija mesüra lenirtem saksalema repranga alitsü ayongzuka

## State healthcare nung solar-power amshitsü mera agir

**Kohima, Monupii/May 28 (TYO):** State nung 'sustainable development' aser 'climate resilience' tsütsü tongtipang mera ka agia Brehostibarnü "Climate Smart Nagaland: Health and Livelihoods" nungja agütsür sentong ka agia liasü.

Sentong ya Ministry aser Department of Health and Family Welfare ajanga SELCO Foundation den lungjemer ayongzük, kong Nagaland nung meta talang nung aliba health facilities 325 nung decentralized renewable energy solution takok ngua mapa kuma inyakba aser ano tarutsü nung 'livelihood initiatives' indanga sayua liasü.

Iba sentong ajanga Nagaland sorkari SELCO Foundation den lungjemer solar energy infrastructure, talisa healthcare aser livelihood sectors nung ulushia aoba jangjatsür.

Deputy Chief Minister T.R. Zeliang-i iba sentong nung jembidang, SELCO Foundation den state lungjemba ya state

asoshi temelenshi mera ka lir, kong sustainable energy solutions ajanga meta talang nung power agi anungba tebilemstsü ajemtsür aser healthcare, livelihoods aser rural development tajungba kumdaksür, ta ashi.

Solar power takok ngua bener arua amshitetba ajanga clean energy ajanga Nagaland jenjang ajungkettsüba sayur aser iba telungjem ya rongsenketzüba ainba aser maparen tasen asoshi maongka tasen lapoktsü, ta pai ashi.

Lisa majungba tebilemstsü liaka sustainable energy innovation asoshi state ya regional hub ka ama akumtsü nukla lir, anungji shisa lemsatepba aser nüburtemi shilem agiba tongtipang, ta Dy. CM Zeliang-i ashi.

Iba sentong nung state aser SELCO Foundation lungjemba mangdang aser takok anguba indang züluba kaket ka saya aser solar-powered systems ajanga meta talang nung healthcare delivery aser tajungba kuma

melenshitsuaba indang documentary ka sayua liasü.

SELCO Foundation indang CEO Harish Hande-i iba sentong nung jembidang, SELCO indang mission ya project inyakba kisüng masü saka yimdam yimtsüngtem tensa nung tera yanger sustainable solutions yanglutsüba nung rangloker, ta ashi.

Paisa akhi mapang nungi amshia aruba yimya aser shisatsü wazüka ayutsü aser itemji techniques balala den meyoktepa amshitsü ayongzuka liasü.

Tarutsü nung yimdam yimtsüng nung alirtem takum jenjang tajungba kumdaksütsü, aluyimer rongsen lenmang ulushitsü aser lemtamatar yaritsü indanga jembia liasü.

Panel discussion mapang Dr. Kika, Dr. Victor aser Dr. Singson nungertem densema medical professionals temi meta talang nung electricity nung temulunglemtsü maliba, senotsü agi anungba aser skill manpower peria maliba indang lemsatepa liasü.

## Lengrijan nung tim masüba mapa inyaksang ya ozüng meteter ka lir: Chang lokti tentet

**Dimapur, Monupii/May 28 (TYO):** Lengrijan nung tetsür chanu ka dak tim masüba mapa inyakba ken o nung tai tonglokja alisang ya Dimapur nung ozüng meteter ka aser taoba mapang ANCSU aser NSF nung ketdangsür liasü, ta Chang kin lokti tentet temi Brehostibarnü ashi.

Chang Union Dimapur (CUD) kimen kidang osangbener den jembidang CUD, Changsao Thangjam Setshang Dimapur (CTSD) aser Chang Students' Union Dimapur (CSUD) lenirtemi ano maneni iba tatalokba aitsü aser ketdangsürtem dang indang-indanga bushisüngdangtsü ayongzük.

CSUD tatong tir I Chejing Chang-i, kechi koma tashitemeteter nisung ka asüyonga ochi-i takok angutsüla, ta ashi.

Pai media aser nüburtem dang tanutsüla maitsü wazüka ayutsü, pei atongba ochi kuma mejembitsü aser timtem ajurua alir tenüng masentsü ayongzuka liasü.

Tanutsüla indang tesayur temi Child Helpline nem osang agütsüba sülen iba ken o temai adok. Iba tatalokba osang ya onoki May 24 nü ang angashi aser itangjisa onok Women Police Station bushia ao, aser timtem ajur alila ya Child Helpline and Child Welfare Committee ket nung lir ta angazük, ta CUD tir Lanuchuba Chang-i ashi.

Union ketdangsürtemi iba sülen tim ketdangsürtem ajuru

asir parnoki tetsürla junga lir saka kanga aoksar lir ta ashi, ta pai ashi.

Iba sülen onoki la asoshi ochi obendang bushia FIR ka benok, shiba Chang kin indang züngsem tejangja ka lir, ta paisa ashi.

CTSD tatong tir Bendangmenla Chang-i iba tatalokba asoshi tebilemstsü akaba lemsatep aser tetsür aser tanurtem tashi taitba nung wazüka ayutsü nungdaker ta ashi.

"Tetsü shingaia pei tanur dak iba ama matalokdaksüner. Onoki iba inyakyim khukhua aitsür aser ochi obendang bushir," ta lai ashi.

Tai tonglokja alisang ya Watimeren aka O Wati lir aser pai anticipatory bail nguogo ta ashir, ta CUD joint secretary Stephen Chang-i ashi.

Bail agentsü atema tim ketdangsür nem tezüluba nung takhangba ka agütsüogo, ta pai metetdaksü.

Tetsürla ya tai tonglokja alisanger kidang school zünga küm ana jungnüa liasü, ta Lanuchuba Chang-isa ashi.

Tai tonglokja alisanger medemer ishika iba mapa inyakba nung densema lir ta ashir.

Parnoki ketdangsürtem dang tai tonglokja alir nem ozüng agi melaba ama tapet temerenshi agütsütsü ayongzük aser nüburtem dang iba tatalokba aitsütsü aser ochi obendang bushiba nung yariteptsü ayongzuka liasü.

Dimapur Naga Students' Union (DNSU) sangdong ka

nung, Dimapur nung tetsür chanu ka dak tim masüba mapa inyakba khukhua aitsür, ta ashi. Iba ama tazü mapa inyakba ya human dignity nung aibelenba lir aser tatok magütsütsüla aser ozüng tesashi agi merenshitsuaba, ta ashi.

Timtem ajurur alila aser lar kibong den onok akang-akanga nokdaka lir aser tekeratiba nung ochi obendang agütsütsü akhanger, ta DNSU-i ashi.

Tetsür chanu ka dak iba ama tim masüba mapa inyakba ya senzuka metoktsütetsü aser memonui aibelenem nem tapet temerenshi agütsütsüla.

Tai tonglokja alisang nem anticipatory bail agütsüogo ta angazüker, koba DNSU-i khukhua aitsür aser iba anticipatory bail ya tekeratiba nung agentsüla mesüra meyipa agütsüla, ta ashi.

Iba ama ken o tulu nung tai tonglokja alir ka talenba makai yutsüba ajanga ochi obendang asoshi timtem aser bushisüngdangba nung tetsükdaksü ka lir, ta DNSU-i ashi.

Ozüng amshirtemi tekeraba nung tai tonglokja alisang aputsüla aser ozüng agi melaba inyakyim tenzüktsüla. Menudaksüba, senzuka yutsüba mesüra atsüanem akaba khenyongi tatok malitsü.

Mapang shidak nung ochi obendang magütsüra, onoki democratic yimya nung mera agütsü, ta DNSU sangdong ajangasa ashi.

## ABCD Christian Education Ministry-i Workshop ka agi



**Dimapur, Monupii/May 28**

**(TYO):** Ao Baptist Church Diphuphar, Christian Education Ministry-i ayongzüka May 17 nü Kinüklong Conference Hall, Ao Baptist Church Diphuphar nung Arok Shisaliok nung Tangajentsü aser Shisaliok Reju nung Arok Inyaksangsh onük dak ajemdaker workshop ka ayongzüka agiogo.

Workshop nung shisalen sayurji Early Intervention Centre, Keystone Education Society Coordinator Toshisangla Jamir aser Learning Support Teacher, Keystone Education Society Imnuksungla Theophilo Jamir

na liasü.

Ajak senteper Sunday school tesayur 18-i iba workshop nung shilem agia liasü.

Workshop ya session ana kuma lemsar agia liasü. Mezüngbuba session ya Inclusive Education aser tasa balala dak rangloker agia liasü. Class kidang tanurtem shilem agidaktsütsü aser kata mezüngtoktsü atem Sunday school tesayurtem nem teyari agütsütsü asoshi practical approaches aser classroom technique tem indang sensaksema liasü.

Tanabuba session ya

tesayurtem supportive counselling skills dak rangloker agia liasü. Session mapang shisalen sayuri counselling, kum balala tanurtem counselling approach angatettsü aser counselling skill tem renloka aotsüba dak rangloker agia liasü.

Sentong nung shilem agirtem dang kaketshirtem emotional tenüngdakba tali tajungba angatettsü aser parnok nongita yaritsü atema ajungshia liasü.

Workshop ya sentong nung shilem agirtem nem shilem agidaktsüba den sensaksem akaba sülen tembanga liasü.

## K. Tokugha Sukhalu-i ULBs & NVCs Committee senden ayonger

**Dimapur, Monupii/May 28**

**(TYO):** Committee on urban Local Bodies & Nagaland Village Councils (Vis-à-vis The Nagaland Municipal Act, 2023 and The Nagaland Village and Tribal Council Act of 1978, as amended up to 2022) indang mendenpuba aser Advisor, K. Tokugha Sukhalu-i Committee

indang introductory meeting ka June 2, 2026 anüngdang 11:30 ako nungi tenzüka Assembly Secretariat, Kohima nung C. Chongshen Committee Room nung jazüka lir.

Iba senden nung Committee züngsem ajak arua adentsü ayongzüker, ta pai sangdong ka nung ashi.

## Longleng nung Smart Meters enoktsüdar

**Dimapur, Monupii/May 28**

**(TYO):** SDO (Electrical) Longleng, Moichung Shembu Phom-i sangdong ka ajanga aser electricity consumer tem dang district Head Quarter nung Smart Meters enoktsüyonga aoba indang metetdaksüogo.

Iba inyakyim Revamped Distribution Sector Scheme (RDSS) ta nungja agütsür power sector digitalization program kübok India sorkar tetuyuba aser policy dak ajemdaker benoka inyakdar.

Sorkar tetuyuba dak ajemdaker electricity supply ajak ya kanga junga inyaksangshiba meter ka ajanga achaayangtsü.

Smart Meter enoktsüba nükjijongji inyakyim temerekba kümdaktsütsü, energy kanga junga achaayangtsü aser consumer tem nem electricity

service tajungtiba agütsütsü asoshi lir. Meter enoktsüba inyakyim ya temelaba agütsür aliba agency aser ketdangsurtemi dang benoka inyakdar.

Ken o dak sendakba nung consumer ajak dang meter enoktsürtem den teka amteper inyaktsü mepeshia metetdaksüogo.

Maneni nüburtem dang smart meter dak sendakba nung osang tai meperokshitsü mepeshia metetdaksüogo. Kuli tejangja maliba osang mesüra osang teyazüi prokshiba ajanga nüburtem mangmangdaksür aser tsübudaktsür. Ken o jangjashinüra mesüra official osang aginüra consumer temi Sub-Divisional Officer, Electrical Sub-Division, Longleng mesüra temelaba agütsür aliba ANVIL ketdangsurtem den tongteprateptetsü.

## Home department-i Census 2027 atema tetuyuba kar agütsü

**Dimapur, Monupii/May 28**

**(TYO):** Census Act, 1948 (37 of 1948) kübok Census Rules, 1990, Rule 8 (ii)b&(vii) nung tashi agüja aliba aser Digital India initiative atema sorkar bendanga agütsür aliba dak ajemdaker Nagaland sorkari Census Phase-I atema Self-Enumeration asoshi step-by-step User Guide dak sendakba nung tetuyuba kar agütsüogo. Iba inyakyim ya 2026 kum June 16 nungi June 30 nü tashi nung benoka inyaktsü.

Department balala ketdangsurtem aser nüburtem dang atakzükja aliba anogo 15 tsüngda Self- Enumeration inyakyim ya jangja jangja benoka inyaktsü metetdaksüogo.

Self-Enumeration (SE) ya census nung inyakyim ka lir, kong nüburtemi parnok kibongtem indang data online ajanga benoktsü. Enumerator temi House-to-House House listing Operations (HLO) metenzük tsüngda SE portal ya anogo 15 atema lapoka toktsütsü.

Lapokba anogo aser kobanü tashi lapoka alitsü iba indang osang portal nung metetdaksütsü. Iba inyakyim ya minute 15 nungi 20 tsüngda dang agitsü aser data takok ngua benokba sülen unique Self Enumeration ID (SE ID) generate asütsü.

**Mezüngbuba jenjang :  
Access & Initial Login**

1. Portal: <https://se.census.gov.in>. amshia portal lapokang
2. Initial Selection: Dropdown nung na aliba State (Nagaland) shimang aser tejakleni aotsü atema Captcha enter süang.
3. Device Tip: Digital map nung ner ki mark asüba tejangjaba angutsü atema laptop mesüra desktop amshitsü ajungshir.

**Tanabuba jenjang: Household Registration**

1. Head of Household: Kibong nung tekolak tenüng züluokang. Kibong nung shiba tekolak aji jangjatsü atema teyari agütsütsü asoshi iba field nung tooltip ka agüja lir.
2. Important: Khen züngoksemba sülen iba tenüng ya memelenshitetsü.
3. Mobile Registration: Kibong nung mashi ka indang mobile number enokang. Kibong shia mobile number ka dang amshitsü aser kasaji tanga kibong ka atema mamshitettsü.
4. Email (Optional): Nenoki email ajanga Self-Enumeration ID (SE ID) agizüktsü atema Email Id ka agütsütetsü.

**Tasembuba jenjang: Language Selection & OTP Verification**

1. Language Preference: Nai mulungba oshi ka shimang.
2. Important: Nai shimba oshiji

khenpika lir memelenshitetsü.

3. OTP Verification: Maneni inyakyonga aotsü aser verify asütsü atema nü registered mobile number nung yokba One-Time Password (OTP) enokang.
4. Tip: OTP agizüktsü atema nü phone network connectivity junga lir mali jangja-ang.

**Pezübuba jenjang: Providing Location Details of Your Residence**

1. Location Entry: Na aliba District shimang aser PIN (Optional) enokang aser yimtsüng/jila, kiyong, ner ki anasa aliba landmark enokang aser "Search" nung nemang.

**Pongbuba jenjang: Locating your Residence on Map**

1. Interactive Mapping: Map ka temerem agi ajener adoktsü. Ki amenoka aliba tesem tejangja metettsü atema na aliba kidangi marker atsür oang. Iba sülen "Save & Next" nung nemang. Na aliba tesem jangjatsü atema confirmation message ka adoktsü.
2. Purpose: Iba ajanga Houselisting Block (HLB) dangi SE data assign sütsütsü yaritsü aser ki shia semdanga aruba mapang Enumerator tem nem teyari agütsütsü.

**Trokbuba jenjang: Completing the Questionnaire**

1. Data Entry: Houselisting

as er Housing Census questionnaire fill süang

2. Guidance Tools: Tasüngdangba kar asoshi Notes (below questions), "Tooltips" aser "FAQs" amshiang.
3. Uniformity: Tasüngdangba tem ya enumerators temi amshiba den mesükteper. Building Number, Census House Number, Use of Census House, aser Household Number amala osang kar Enumerator temi field semdangba mapang balaka mangaoktsü.
4. Navigation: System yagi tejakleni mao tsüngda current screen tembanga inyaktsü nüngdaker, ajisüaka nai meyipa or taoba mapang enoka aliba tem memelenshitetsü.

**Tenetbuba jenjang: Review of entered data**

1. Preview: Data enoka aliba section-wise nung lepareprangshitsü atema Preview screen amshiang. Iba stage nung data edit süshitettsü.
2. Save as Draft: Nai finalise asütsü atema osang ya draft ama save sütettsü aser tatemangbuba anogo matong tsüngda benoktetsü.

**Tibuba jenjang: Final Submission**

1. Locking Data: Osang ajak agi temulung asüba sülen nai "Final Submit" nung nemang. Iba sülen Enumerator temi

dang ashi osang kecha memelenshitetsü.

2. Submission Deadline: Data benoktsü atema tatemangbuba anogoji tapak ajak nung marquee ama sayutsü. State/UTs closing date tashi nung data mebenokra Self Enumeration ya tembangogo ta mezüngshitsü.
3. Generation of ID: Data takok ngua benokba sülen unique 11-digit SE ID (prefixed with "H") ka generate asütsü aser sayutsü. SE ID ya SMS aser Email (if provided) ajanga yoktsü. Iba ya screenshot süa ayutsü mesüra züluoka ayutsü ajungshir.
4. Retrieving SE ID: Registered mobile number ajanga Portal nung SE ID retrieve asütsü atema provision agüja lir.

**Tekububa jenjang: Field Validation**

1. Enumerator Visit: Census Enumerator temi ner ki semdangba mapang nü indang SE ID pa/la den lemsatempang.
2. ID Matching: SE ID ya Enumerator indang mobile nung SE ID mashi ka den kasa süra nü indang SE data jangjaogo, agizükogo aser benokogo ta metetdang. SE ID kasa mesüra Enumerator temi ner household data bendenshitsü.



Hyderabad, May 28, 2026: Enforcement Directorate-i taoba mapang Kerala Chief Minister, Pinarayi Vijayan indang kiojen mita aoba anema CPI(M) züngsemtemi longkak aitba noksa nung angur.

### Election Commission-i senso atema telemtetba agitsü makok: SC

**New Delhi, May 28 (Agencies):** Supreme Court-i, Bihar nung Election Commission-i special intensive revision (SIR) agibaji tim dang, ajisüaka nisung ka linük senso asü masüar telemtetba agitsü atema Election Commission dak tashi mali, ta metetdaksü. Supreme Court-i, Citizenship Act kübok tim ketdangseri dang linük senso dak sendakba nung telemtetba agitsü akok, ta metetdaksü. SC-isa Election Commission dang Bihar nung

voters list nungi agienba tenüngtemji hopta pezü tsünga tim ketdangsertem nem agüjang, aser parnoki dang item nisungtemji senso asü masüar telemtetba agitsü, ta metetdaksü. Chief Justice Surya Kant aser Justice Joymalya Bagchi nati akümba bench-i agütsüba obendangji Bengal nung SIR mapang voters list nungi agienba tenüngtem atema kasa inyaksangshitsüa akok. Bengal nung SIR agiba mapang nung electoral roll nungi tenüng lakh

27 agiena liasü. SC-i, SIR agitsü atema EC dak tashi lir, ajisüaka linük sensotem masü ta shia tenüng agientsü atema parnok dak tashi tulu mali, ta metetdaksü. Linük nung senso asü masüar iba telemtetbaji tim ketdangsertemi dang agitsü, ta SC-i ashi. SC-i, RP Act kübok Arrla 16 ajanga electoral roll nung senso masüba nisungtem anentsütsü atema shia lir aser iba arrlaji tejangja, ta metetdaksü.

### Bengal sorkari BSF nem ali hectare 600 agütsüogo: Amit Shah

**New Delhi, May 28 (Agencies):** Brihostibarnü Union Home Minister Amit Shah-i, Bangladesh den arrtsülen atsü atsütsü atema state sorkari Border Security Force (BSF) nem ali hectare 600 agütsüogo, ta metetdaksü. BJP-i, taoba mapang Mamata Banerjee-i aniba sorkari ozüng alema Bangladesh nungi aruba bendangertem nem tejenokdak agütsür, ta aitsür. Union Home Minister-i, West Bengal nung BJP sorkari anogo tenet tsünga Border Security Force (BSF) nem ali hectare 600 agütsüogo, aser ibaji Bangladesh arrtsülen atsü atsütsü atema lir, ta metetdaksü. Gandhinagar district kübok Sonipur yimdak sen crore 340 jenjang terenlok projects

tenzüksüba sentong nung jembidang Amit Shah-i, election mapang nung BJP-i nangzükba ama atangji ataloktsür, ta metetdaksü. "Election atema nüboyimba mapang nung onoki nenok dang, nenoki onok yaria sorkar kümdaktsüra onoki anogo ishika tsünga Bangladesh den arrtsülen atsü atsüba maparen tenzüksü ta nangzüka liasü," ta pai metetdaksü. West Bengal Chief Minister, Suvendu Adhikari nem tenüngsang agüja Shah-i, "Anogo tenet tsünga BSF nem ali hectare 600 agütsüba atema ni West Bengal Chief Minister Suvendu Adhikari nem tenüngsang agütsür. Iba dak alia Chicken Neck area nung aliba ali hectare 121 Central sorkar nem agütsüogo," ta metetdaksü. "Tamalen Mamata

yimsüsüba kübok anogo shia bendangertem ozüng alema state telungi aita liasü, ajisüaka tangbo parnok aritepa meyipa odar," ta paisa metetdaksü. Bengal election nung BJP-i takok ngua sorkar akümba sülen state sorkari ozüng alema arua aliba Bangladesh nungertem meindoktsü atema maparen tenzüko. West Bengal Chief Minister Suvendu Adhikari-i 'Detect, delete & deport' inyakyim sangdonga ketdangsertem dang iba inyakyimji mapa küma inyakang, ta tuyuogo. West Bengal aser Bangladesh na tsünga arrtsü kilometer 2,217 lir. Tang tashi nung kilometer 1,600 nungbo atsü atsüadokogo saka taoba sorkar kübok ali tsütsü mangatettep aliba agi kilometre 600 jungnüa nungbo atsü matsü.

### Parliamentary standing committee-i NTA dang asüngdangya

**New Delhi, Monupii/May 28 (Agencies):** NEET paper leak asüba ken o dak sendakba nung Parliamentary standing committee on education-i National Testing Agency (NTA) dang asüngdangyaogo, ta osang ka ajanga metetdaksü. Parliamentary Committee jagi NTA dang question paper renemba, oshi balala nung meyipzükba, print asüba aser question paper belenshiba inyakyim tejangja asüngdang. Committee-isa NTA dang question paper renemtsü atema mongintem shimdang coaching centres lapoka aliba kiburtem-a shimmer asü? ta asüngdang. Committee jagi NTA dang tasüngdangba 20 shi asüngdangogo, ta osang angazüker. National Eligibility cum Entrance Test Under Graduate (NEET-UG) 2026 tatidang ya May 3 nü agia liasü, ajisüaka question paper leak asüba osang temai adokba sülen CBI-i bushisüngdang tenzük, aser iba ken o nung nisung aika puogo.

Parliamentary standing committee on education nung züngsem 28 lir. Züngsemtem rongnung BJP nungi parnok 17 lir. Hombarnüa iba committee senden mena NTA-i ketdangshüa agiba examinations nung ochimashi aliba atema o lemteptsü. Parnoki iba senden nung adentsü atema NTA ketdangsertem-a jaokogo. Committee-isa NTA dang 2024 küm NEET paper leak asüba sülen K. Radhakrishnan Committee-i benokba onük kwika mapa küma benok, ta asüngdangogo. K. Radhakrishnan-i aniba Committee jagi tebilemba onük 101 benoka liasü, aser item rongnung JEE-Main tatidang ama NEET tatidang-a shilem lemsar agitsü atema benoka liasü. June 21 nü NEET tatidang tanaben agishitsü aliba atema renemshibaji Union Education minister Dharmendra Pradhan-i asadangogo.

### Karnataka nung Siddaramaiah-i Chief Minister menden toktsür



**New Delhi, May 28 (Agencies):** Küm asem tejaklen Karnataka assembly election nung Congress-i takok anguba sülen Siddaramaiah-i Chief Minister tenangzükba agia liasü, aser tang pa kümsük tesadang abensaba mapang nung pai iba menden toktsür. Deputy Chief Minister D.K. Shivakumar nem CM menden agütsütsüa akok. Brihostibarnü arrshi küm 77, Siddaramaiah-i cabinet züngsemtem ayongzüka senden ka amenba mapang nung pai CM menden toktsütsü, ta metetdaksü.

senden ka mena liasü. Lenir anati Lok Sabha nung opposition lenir Rahul Gandhi, AICC Tir Mallikarjun Kharge aser party general secretaries K.C. Venugopal aser Randeep Singh Surjewala nung ajurua liasü. Iba senden nungji lenirtemi Siddaramaiah dang CM menden toktsür Central nung shilem agitsü asüngdang ta osang angazüker. Tamalen Siddaramaiah-i, Lok Sabha nung opposition lenir Rahul Gandhi pa dang CM menden tokjang ta shira pai toktsütsü, ta metetdaksa liasü. Brihostibarnü Congress

Iba osang sangdongba sülen Bengaluru tesem ajaklen Shivakumar pusemertem benjungtep. Bodhbar aonung nungi Shivakumar pusemertem par kima adenshia liasü. Osang angazükba agi, Congress nung bangdak lenirtemi Siddaramaiah dang lenir melentsü atema iba menden tokjang ta asüngdanga liasü. Mongolbarnü Congress-i Siddaramaiah aser Shivakumar na New Delhi-i jaokba sülen Congress headquarters nung

MLA aser Administrative Reforms Commission nung chairperson R.V. Deshpande-i, Siddaramaiah-ia CM menden nungi anentsü telemtetba agiogo, ta metetdaksü. Ano külen Karnataka State Federation of Backward Class Communities-i Congress dang, Siddaramaiah CM menden nungi anendaktsüra parnoki longkak aittsü, kechiyong backward class aser AHINDA-i pusemba ajanga dang Congress-i takok angu, ta metetdaksüogo.



Kolkata, May 28, 2026: Eid anogomong nung Muslim nungertemi Kolkata nung aliba Brigade Parade Ground nung sarasadem dang tangokba noksa nung angur.



## TIR YIMYIM YIMOBILEM (EDITRIAL)

DIMAPUR FRIDAY, MAY (MONUPII) 29, 2026

### Nagaland Naga Telungjem

**N**aga kintem ajaki Naga nunger lungjema linür saka lungjemtsü melen telemsa-ang tali tali akümer ta aliba mapang ka, tang Nagaland nung aliba Naga kintem ajak lungjema alitsü asoshi Nagaland Tribal Hohos Coordination Committee ka kümtetbaji, Nagaland nung alir Naga kintem asoshi dang masü, saka India aser Myanmar nung aliba Naga kintem ajak asoshi osang tajung ka asütsü. Myanmar nung aliba Naga kintema telungjem lir aser India küboka Manipur nung aliba Naga kintem lungjemer United Naga Council (UNC) tenteta lir. Aji oda, Assam nunga Naga kintem lir saka Assam Naga telungjembo tenteta mali südi. Ajisüaka, state shia nung Naga nunger telungjem tenteta liang teli, Naga nungertem nem telungjem lenisüba agütsütsüba tongtibang telokji Nagaland nung aliba Naga kintem ya asütsü. Aji oda, tang Nagaland nung aliba Naga kintem ajak telungjem ka tentetbaji tanga state aser tanga lima nung aliba Naga kintem senzüka toktsür balaka aoer ta masü saka Naga nunger alima tesem koba nungsa pei lima küma mesemteta ali, item ajak atemaji khuret bena Naga kintem putepa alitsü asoshi mera tajung ka agir asütsü. Atangji, alima nung nisungtemi mapa agi mesayuteter dang ashi nisung ajaki lungjema linür aser lungjema linür rongnung Naga nungertemisa telungjemnüba saka tia majung, Naga nungersa melungjemtetba ser küm aika arur. Aji oda, Naga nunger lokti tentet ka ser lungjema alitsü asoshi Naga Hohoa tentetdangogo saka Naga Hoho telungjem küboka Naga kintem ajak maittet, anungji Naga Hoho tenteta yur Naga nunger telungjemba-telungjemba akümtsü melen melungjemba melungjemba ta küma aoba asenoki ajangshiogo. Iba amaji asenoki kanga lungjema linür saka melitet, Naga nunger anüdoklen alirtema tentet balaka, Nagaland tiyongtsü nung alir kintema tentet balaka aser Naga nunger anüolen alirtema telok balaka ta lokti telungjem ka kübokbo külemi melungjemtet lia aruogo. Ano, Naga nunger lungjema melitetba timtem kaji, Naga kintem ajak lungjema melitetyonga, Nagaland anüdok, anülü aser tiyong nung alir Naga kintem telungjemjibo shitakba lungjemer alir masü saka Naga nunger anüdok, anülü aser tiyong nung alir kintem telungjem balala kübok alir kintemjisa meputepba angur. Aji oda, tanga Naga nungertemi Yisu temeim yimsü tajung agizüka amanger küm noklang dak tali amanga aruyonga, ano tesem aika nung kin o kin na aser yimtsüng o yimtsüng na tsükchitepba agi tetsüba tia nung aliba purtem aika lir. Joko, item tsüngdangji yimjung yanglutsüi America nungertema marutsü aser British nungertema marutsü, anungji Naga nungertemi peisasa Naga kintem rongnung putepa yaritepa alitsü asoshi apiteta inyaktsüla. Iba mapa atemaji tang tentetba Naga Tribal Hohos Coordination Committee ji asütsü imlar. Akhidangbo, Naga nunger telungjem aser teputep atema Tsüngrem tenzükertema pei lima toktsür tetsüng agi tonga oa nübortem rongnung Yisu temeim indang angatetdakja taitoktepdaktsü aser yimjung yanglutsü. Iba amaji yimten nung lenirtemi tetsüng agi Naga nunger yimtsüng balala sema jaja aser tangatetba tajung agütsü. Ibayongji, lepteptsüngtep anen aser Naga ta asüba ojang agi Naga nunger lungjemdaktsü. Iba kasa Naga nungertem putepdaktsüba aser lungjemdaktsüba mapaji asentenshir, NHTCC ajanga inyaktsü teimla tulu lir. Iba tangatetba nung NHTCC yabo yimten telok Congress, BJP aser NPF teloktem ama dang nungi jenjang temaba aser khureta tuluba ta bilema inyaktsü imlar. Kasaji, NHTCC yabo NSCN aser NNC teloktem dang nungi jenjang temaba aser khureta tuluba ta bilema, Naga yimten tebilemstü ya akoktsü asoshi telungjem akangshir inyaktsü imlar. Ashiko, Nagaland nung alir Naga nunger kintem lokti tentet ka kübok külemi alitsüsa lungjemtetba mapa ya Tsüngremer mapang tajung ka asütsüa akok, kechiyong alima nung mapa ajak asoshi pei pei mapang lir, aser tang ya Naga kintem asoshi Naga nunger lungjemer Naga yimten tebilemstü akoktsüba mapang ka arur asütsüa akok, anungji ajaki sarasademtsüla.

## OLEMSABANG

### MERAJEMBA TEKUREM

~ L. Temjenwapang

*(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem rongnung ka liasü)*

*(Yashi adok nungi...)*

Idangji pa mulungjangi akidang pa lanuwa tebu sayuba o ka bilemtet. Koba mapang aseni shir yaritsüla itemburji nübu rongsen kechi agi yaritsü tim iba jagi yaritsüji kodanga tamadok ta tebu ashiba o tu bilemtet. Saka tanü pa taküm aser par kibongi ibala mapaji inyaktsü kangasa tamakoktsü liasü, idangji ano, pa mulung zürepaji taliang aküm aser tejashi marem, mena aliba makümüji peretdaktsü idangji tzüshirong nung tzüshi pezü, pongu ka jakrepa aon.

Tia maka mapang tatsüka lir külen par nokinketer yimti nisung tashi agibo lao daktsütsüji tamakoktsü liasüba tu, par yimli nung ajungbena aya wara ka aru aser aji kanga dang tesüngmangtsü ka liasü. Yimti nüburtemi küm tepiyong tsünü süngpongtsü yokba aser alu ajak tu ajungbena dang Süngko (grasshopper) tapu ka poktet aser aonsotsü aser motong ajak chimatsü. Küm tepiyong inyakba ajaktu amajok kümer alu ajunga tazüng aküm. Joko yimer ajaktu chiyongtsü agi anünger kibong ajunga nung makamait agi timtemteper, idangji Wangshibar kibong nungtu petsa perong olura adoker kechiba süra Tzükongla dak temeim mali, ano awashi memetet, tila maküm, ngasangadem, timtem marem, anungji iba ama makamait tesem nung ni melitetsü ta sür tanur jala kajia ner chirji nai mesüang ta shir la sasa kidang nungi ayazüka ao. Idangji Wangshiba yamai masür ta noktandang, saka, kodasür Tzükongla pangji akoktsü, pa asoshi ibaji tamakoktsü liasü aser laji odang taoba aküm.

Joko Wangshiba tsürabur anaprong süadoker ali nung, ano kinüngtsüa toktsür oadok, anungji pa asoshi shisabulu khuret agi amang o sangwa na mepentangtet ka kümer, teyimla kecha makai par atepzüng nung temeimtsü jala ji azüiter jeba alidang, pai kanga sa yaria aliba, Rongjenba tu aru. Hai Temba, na kechiba yamai shisabulur? Ya alima atu, yipru sülenang tesünep arurago. Ni ne tia ajak meteta lir. Na kecha shisatebulu, nai ajak tongjema meteta lir. Saka na-a meimchirji tu naia ka merajema ya. Tetsür jembishinü osü tajunga ta sür kibalembu nung nai tasü ait. Iba jagi tanü ya ajurur, saka asen yimtsür tajung aika ne ki arunüseta lir tu ta temulung senzükja pa temba Rongjenba teyari ajanga yimtsür mulung tok tajung ka agir pelatepa tetsü o tebu na koma meimtepa aru yamaji lia ao.

Kenü anogo Ronjenba kisemi arur, Ohi Temba, Wangshiba; Lirgo, arung na aruba ya shitaka ya (tena sensaksem tenzük) Wangshiba; Temba, Ni kü taküm nung ajak abensar meteta rajema tongjema lir ama bilem saka oda merajem metongjem aika lir asüa nuh. Tanü kü tsürabur meliaka nai ni shisatsü nung yamai yariba ya kanga pelar, ta shia pa tashi maitem sasasete lemsatep.

"Asenok taküm nung aika tonga meteta rajema alitsü akok, saka merajembaji temoatsü ka amai, mesüra tepelatsü, konang nüngsang ka amai arudang saksalema shisaka alitsü nüngdaker".

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# Germany nung Open Doors-i sentong ka ayongzuka agi



Karlsruhe, Germany nung Open Doors-i ayongzuka sentong ka nung Indonesia tsür, Vina-i jembidang tangokba noksa nung angur.

**May 28, 2026:** Tawa Khristan melungtet telok Open Doors-i Germany kübok Karlsruhe yimti nung ayongzuka sentong ka nung nisung 9,000 dak tali aden. Iba sentong nungji jembidang North Korea linük nungi jena otetba pastor kati, North Korea nung Kim kibongi yimsüsüba tatembanglen kati arudar, ta metetdakja liasü.

May 14-16 anogotem nung ayongzuka agiba mezüng anogo nung Youth Day on Ascension Day among aser nikongdang sarasadem sentong ka agiba sülen tongti sentongji May 16 nü

agia liasü, ta Germany Open Doors-i metetdaksü. Iba sentong nungji Indonesia, Burkina Faso, North Korea, Mexico aser Central Asia nungi o jembirtemi peipei linük nung Khristantemi reshikangshi ajangshiba osang metetdakja liasü.

Iba sentong nung jembidang Indonesia tsür, Vina-i, 2021 küm bomb amshia lar Arogo Tenla ki amakba mapang nung la kanga mejungi yirua liasü, ta metetdaksü.

North Korea nungi pastor, Jung Jik-i, pa küm aika labor

camp nung reshikangshia liasü, ta ashiba den külemi Korean Peninsula ya kobi melii longjemtsü inlar, ta ashi.

Tongti sentong tembangba sülen parnoki hall telung nung reshikangshi ajangshiba Khristantem atema sarasadem onüktem maaloka yutsü.

Iba sentong nung Outbreak band-i ken tena liasü aser recordings ji Open Doors Germany indang website nung angitsü.

Open Doors yagi linük 70 nung reshikangshi ajangshiba Khristantem yaria arudar.

# Chhattisgarh nung tribal Khristantem nem tzü metadaksür

**May 28, 2026:** Chhattisgarh state nung taküm April ita tetenzüklen nungi tenzuka yimtsüng aika nung tribal Khristantem nem tzü metadaksüba aser maongka balala magütsüba atema tashishiba metetdaksü.

Osangbenertem den jembidang Jila Masih Astha Samaj nung Tir aser pastor, Mohan Gawal-i, "Onoki yimtsüng aser district level nungi ketdangsertem nem temepishiba aiben agütsüogo, ajisüaka parnoki telangzüba magütsüba ajanga onok jashir," ta metetdaksü.

Kanker district nung denomination balalai tentetba Jila Masih Astha Samaj nungi team kati May ita tomnen yimtsüng 32 semdanga nisung 60 shi ajurua liasü.

Pastor Gawal-i, Kanker district kübok Antagarh nung Khristan kibong 26 nem ayong mesüra tzübo nungi tzü metadaksür aser Khristan kibong 41 nem rural employment guarantee scheme kübok teyari magütsür, ta metetdaksü.

Iba dak alia Khristan kibong 115 nem 'tendu' tou meyatadaksür, ta team jagi bushitet.

Ano Khristan kibong pezüü tractor-trolley nung süng aika

tatsüksü bendena aliba-a yimdaklirtemi rakzuka ayu.

April 28 aser April 30 anogotem nung tribal Khristantemi district collector aser superintendent of police na densema tongti ketdangsertem dang Khristantem sendokba osangji metetdakja teyari meshia shidi zülua liasü.

Yimdaklir Khristantem jagi April 11 anogo nungi yimtsüngtem nung yimsüsürtem nem temepishiba agüja arur, ajisüaka tang tashi Khristantem sendoker.

Pastor Gawal-i, "Parnoki ajangshibaji tebilemstü akatsüsa lir. Mei mapang nung tzü tajemtsü magütsüba aser mapa inyaksü maongka magütsübaaji tim masü," ta ashi.

"Yimsü nung ajemdaker Khristan kibongtem anema inyaker. Khristantemi timtem kanga ajangshir, ajsüaka ibaji ajanga parnok tamang jenjang manokshir," ta pai ashi.

"Khristantemi meta talang pilar aliba yimtsüngtem nungi tzü atatsüsa akümer, aser ibajia aonung mimshia inyaksüsa akümer," ta Gawal-i ashi.

Progressive Christian Alliance (PCA) Coordinator, pastor Simon Digbal Tand-i, "Yimdaklir Khristantem dang Tenla kidangi maotsüla aser

Hindu yimsü dangi tanaben meyiptsüla ta ashir," ta metetdaksü.

Digbal Tand-i, tang tzüngluruwa mongpu nung Khristantem nem alu-a meyimdaksütsüa akok ta Khristantem shisabulur, ta ashi.

Pastor tem jagi, yimdaklir Khristantem nem tzü metadaksüba aser mapa inyaksü memelabaji meimchir temeden anema lir, ta metetdaksü.

"Yimsü nung ajemdaker tenokdangba balala benokbaji linük temzüng aser meimchir temeden anema lir," ta pastor temi metetdaksü.

"Onoki state aser Central sorkartem dang Kanker district nung tatalokbatemji metetdakja Khristan kibongtem nem temeden agüjang ta mepishiogo," ta parnokisa metetdaksü.

Mapang shia meimchir temeden atema inyakertemi Chhattisgarh nung Khristantem anema inyakba mapatem anema ola adoker.

2024 küm nunga Chhattisgarh nung Khristantem anema inyakba tatalokba 165 liasü.

Nütsüng million 30 aliba Chhattisgarh state nung nütsüng shilem 2 shi dang Khristantem lir.

# ANOGO ABEN TSÜNGREM DEN

## Tasü Nungi Taküm Dangi

"Pai tasüba samadakja, osangtajung ajanga taküm aser tasüba tesangwa daki bener aru".  
- 2 Timoti 1: 10.

Kangki nung Khrista mapaji Tsüngrem taochi tiyongtsü sür inyak. Tsüngrem taochi agi meimchir tekümtet mapa inyak. Kümtetdakba Yisu Khrista aruba ajanga taochi talubusa adok.

Asenoki shisadangtsü asoshi telemsa asem - Kaji tesüiba nung atalok aser tang alir. Ka tang temoatsü maneni alir, aser asemububaji tamanger ajak dang nangzükba.

Mezüngbuba, Pai tasüba endoktsü. Iba tetezü tasübaji joko mali ta masü. Khrista kangki mapa ajanga Adam menen temerenshi melenshi. Tasübai Khrista kangki nung ajuru saka makok. Yamaji tamangertem asoshi tasübaji tetsübuttsü mali. Kechiaser tamangertem asoshi Khristai teti asoshi tasüba madak takok tulu nguogo.

Tanabuba, Khrista asüba nung Tsüngrem nükjidong taküm adokdaksütsüba. Shia arubaji Tsüngremi tamangertem ajak nem taküm agütsüdak.

Tasembuba temoatsüji, asenok masütsü tenangzükba. Iba tetezü asenoki tasüba majangtsüla ta masü. Iba tetezü asenok tasüba nung teti malitsü. Mamangertem tasübai aibaji dang masü, saka tasü nungi kodanga madoktsü. Parnok asoshi tasübaji Tsüngrem nungi pilaba saka tamangertembo tasü süngkümi iaka masütsü.

# Pakistan nung Khristantemi kasa temeden meshir



Islamabad nung aliba National Press Club nung Khristan lenirtemi osangbenertem den jembidang tangokba noksa nung angur.

**May 28, 2026:** Pakistan nung Khristan temeden atema inyakba organizations-i sorkar dang 28th Constitutional Amendment Bill nungi Khristantem nem kasa temeden agütsütsü aser Khristantem kümzüksü atema arlatem-a inoksemang, ta takhangba agütsüogo.

Taoba hopta Islamabad nung aliba National Press Club nung osangbenertem den jembidang Minorities Alliance Pakistan (MAP) aser parnok den densema aliba telok balala nungi lenirtemi, linük nung nütsüng ajema aliba yimsü teloktem nem-a kasa temeden agütsütsüla, yimsüsüba menden nung kasa maongka agütsütsüla aser tekümzüksüba agütsütsüla, ta metetdaksü.

Osangbenertem den jembidang MAP Chairman Advocate Akmal Bhatti-i, "Ozüng kübok senso ajak kasa züngshitsü aser kasa maongka agütsütsü atema ozüng yanglushitsü nüngdak," ta metetdaksü.

Iba atemaji 28th

Constitutional Amendment Bill nung arlatem züngoktsüla, ta pai ashi.

Iba Bill ya taruba Parliament senden nung benoktsüa akok.

Pakistan temzüng kübok National Assembly nung Muslim nunger masüba nisungtem atema menden 10 shiteta yuja lir aser provincial assemblies pezü nung menden 24 shiteta yuja lir. Iba dak alia Senate nung minorities atema menden 4 shiteta yuja lir.

MAP-isa sorkar dang Centre aser provincial sorkar mapatem aser shisaliok rejutem nung minorities nem menden shilem 5 shiteta yujang, ta takhangba agütsü.

Osangbenertem senden nungji Khristan temeden atema inyakba telok Rwadari Tehreek nung Chairman Samson Salamat, taoba mapang yimsüsür Tahir Naveed Chaudhry aser Robin Daniel nungeria jembia liasü.

Nütsüng million 241 aliba Pakistan linük nung nütsüng shilem 1.37 dang Khristantem lir.

AO OSHI ANGAZÜKDAK:

TANÜ ANGAZÜKTSÜBA OJANG



Yimchi

(n) tsük saru ataksü yimteni lateta ayuba oset ( a traditional standard basket for measuring of grain in a village) \* Ozü yimtak küm shia yimteni tsük yimchi anana sarur.

Yimdang

(v) tzü tulu agi nokdang ( prevent by flood type water flow) \* Tzünglu tulu aruba agi onok moutettsüsa tzüla tzü yimdang..

OLONG PAITEP # 7518

15x15 crossword grid with numbers 1-17 indicating starting positions for words.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S\_ \_ \_ i - (3)
9. Nisung rongnung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Kenyongi majinü - (5)
13. Rong kanga tulu - (5)

OLONG PAITEP # 7517 TELANGZÜBA

TIPIEN :

- 1. Semtu, 3. Lepko, 5. Bilem, 8. Ulu, 10. Tsünpang, 11. Tesangwa, 13. Aoksa, 15. Putir, 16. Yipru.

LANGTSÜNGLEN :

- 1. Sayu, 2. Teb, 4. Kimong, 6. Lungkak, 7. Milak, 9. Zünga, 10. Temopu, 12. Walu, 14. Ali.

NAI-A YA METETTER



Rajasthan Royals nungi opener Vaibhav Sooryavanshi-i Chris Gayle ajateta IPL season ka nung six timtiba azükba asayar kümogo. IPL 2026 Eliminator nung Sunrisers Hyderabad den asayaba mapang pai six tenet züka Gayle-i 2012 küm IPL nung six 59 züker aliba ajateta liasü.

Naga nunger 6 pur aoba ken o nung nisung 4 puogo: CM



Manipur Chief Minister Yumnam Khemchand Singh-i Kangpokpi district nung Naga nunger yimtsüng Makhan semdangba mapang tangokba noksa nung angur.

Imphal, Monupii/May 28 (Agencies): Manipur Chief Minister Yumnam Khemchand Singh-i Brehostibarnü ashiba agi, Naga nunger civilian trok pur aoba ken o nung security force temi temulung melemi bilemer nisung pezü puogo. Maneni pur aoertem bushiteta anir arutsü atema bushisüngdang südar. Kangpokpi district nung Naga nunger yimtsüng Makhan semdangba mapang osangbenertem den jembidang Chief Minister-i ashiba agi, iba tatalokba nung sendaka alirtem bushiteta aputsü atema maneni bushisüngdang südar. Singh-i Makhan Baptist

Church nung amenoka aliba relief camp ka nung internally displaced persons (IDPs) tem semdang, kong tanur aser tetsür densema nisung 55 jenoka lir. Iba camp nung Konsakhul yimtsüng nung alirtem jenoka lir. Ketdangsürtemi ashiba agi, camp nung alirtem rongnung taoba mapang pur ooba chioker alir yimdaklirtem densema lir. Iba yimtsüng semdangba mapang Chief Minister-i, jang, pulses, potato, onion, totzü, shine, süngojok aser amtsük densema relief osettem lemja liasü. Paisa, yimtsüng community hall semdang aser IDP tem talila jenokdaksütsü atema local ketdangsürtem aser yimtsüng

nung lenirtem den sensaksema liasü. Kasa mapang nung Kangpokpi Deputy Commissioner dang relief camp nung alirtem nem talemtsü sü aser merila sü amala tenüngdakba osettem lemstsüsü tetuyuba agütsüogo. Yimtsüng lenirtemi Chief Minister dang tawa tatalokbatem sülen Kangpokpi district nung aliba Naga nunger kibongtem aika pei ki toktsür jenaogo ta ashi. Deputy Chief Minister Losii Dikho den MLA tem aser civil aser police ketdangsürtemi yimtsüng semdangba mapang Singh meiner oa liasü.

Arunachal nung digital teacher transfer system ka amenokogo

Itanagar, Monupii/May 28 (Agencies): Arunachal Pradesh sorkari digital teacher transfer aser posting mechanism ka amenokogo. Inyakyim temerekba kümdaksütsü, staff tem kasa lemdangtsü aser state nung school attendance kanga junga asadanga alitsü atema iba jenjang ya agiogo. 'Reach to Teach' programme kübok amenokba inyakyim tasenba ya Education Commissioner Amjad Tak Bodhbarnü-i sangdongogo. Iba inyakyim yagi kinük nung aliba tesemtem nung tesayurtem agi anüngba ken o bentettsütsü, aser tesayurtem transfer asüba inyakyim tezübaba kümdaksütsü meranger. Temelenshi nung shilem ka ama sorkari online Teacher Registry Portal ka yangluogo, aser iba yagi transfer asütsü mepeshiba, service osang aser tesayurtem posting record tem

digitally achaayangtsü. Ketdangsürtemi ashiba agi, tesayur 16,068 shi, koba state nung tesayur shilem 97.4 asütsü aser ministerial employees 107 iba sabang nung züngoksematokogo. Iba portal yagi tesayurtem taoba mapang inyakba tesem, classroom nung parnok tesayuba yimya, kaketshirtem takok aser tamakok aser medical osang tejangja mangaoka ayutsü. Iba ajanga shisaluyim wadang nung inyakyim temerekba kümdaksütsü aser ketdangsüba nung aibelen tajemba kümdaksütsü ta ketdangsürtemi amanger. Tak-i ashiba agi, Arunachal Pradesh nung tesem aika tonga aotsü tasak asüba temulungdang yur iba transfer policy ya yangluogo aser kasa mapang nung iba ajanga tesayurtem transfer asüba mapang timtemba tajemba

kümdaksütsü. Tang tashi nung education department-i intra-district transfer order 2,064 agütsüogo aser tesadangbo tembanga inyakogo. Iba den bendenloksema tesayur 600 dak temai portal nung self-transfer option agüja aliba nung transfer atema apply süogo. Department-isa, nüngdak dang süra tesayurtem manually transfer asütsü aser tesayurtemi transfer asütsü atema temepeshiba magüjaka tesayur agi anüngba school atema iba jenjang ya agitsü. Sorkari kinük nung aliba school tem nung tesayur-kaketshir ration ya 1:45 nung ayutsü merangdar. Maneni commissioner-i, tesayur shirnok transfer asüba sülen anogo 15 tsüngda pei tata tesemi tonga maolir parnok Act dak ajemdaker merenshitsü, ta metetdaksüogo.

Manipur: KCP lenir tejen ka Delhi nung apu

Guwahati, Monupii/May 28 (Agencies): Delhi Police Special Cell, Manipur Police aser central intelligence agency tem longjemer mieta aoba mapang Delhi nung Kangleipak Communist Party (KCP) lenir Haobijam Dilip Singh puogo. Security ketdangsürtemi ashiba agi, Singh ya miim senden ka nung adentsü atema linük yimtiba tonger aliba mapang apu. Ketdangsürtemi ashiba agi, pa ya Unlawful Activities (Prevention) Act (UAPA) aser tanga criminal

provisions kübok benoka aliba ken o 12 dak tema nung aputsü bushia liasü. Ken o ashishiba mapang osang angazükba dak ajemdaker security force temi Manipur kübok Kakching district nung meita aoba sentong ka benok, aser iba mapang prangbong injang aser telungpur inyakyim dak sendaka alitsü ta temulung melemi bilemba osettem nguteta liasü. Pua aliba osettem rongnung prangbong, injang, tarpaulin sheet, plastic yangku, sentsüh

balala backpack tem aser Redmi 13C mobile phone ka densema lir. Ketdangsürtemi ashiba agi, Manipur aser parnok meketa aliba tesemtem nung telungpurtem tesendaktep raksatsütsü atema jenjang agiba mapang iba meita aoba sentong ya kanga takok ngua benoka inyakogo. Bushisüngdangertemi tang pa den sendaktepa alirtem aser ozüng alema inyaksangshiba telok den sendaktepba aliba kaktetsü atema jenjang agidar, ta ketdangsürtemi shisem.

## Israel-i Lebanon south tsütsü tesashiba amaker, nisung 16 tepset

**Beirut, Monupii/May 28 (Agencies):** Israel-i Lebanon south tsütsü amakdang nisung 16 tepset aser 58 yirutsü ta Lebanese health ketdangsür temi ashir aser Israel-i tang tesashiba amaker aser nüburttem ainshitsü totuyuba agüja lir.

Lebanon sorkar meyong National News Agency ajanga Brehostibarnü ashiba agi, asürtem rongnung nisung trok kibong ka nungi dang lir. Parnok ya Adloun Highway nung anepdang züngia lia jena aotsü merangba mapang Israel indang drone kati maka tepset.

Israel-i southern Lebanon nung bomb pokloktsüba tali akumba mapang iba tesem nungya amak, kong nisung aliba tesem, lenmangtem aser civilian ki o jen nunga amaker.

Lebanese army ajanga ashiba agi, Israel-i Nabatieh tesem amakdang par sepaia ka tepset, koba mitkartem dak tenük yoker makyonga aruba nung tesüsaba alitsü. Southern Lebanon aser western Beqaa

Valley nung tawa amakdang ano sepaia kar tepseta lir.

Israel-isa Tyre aser temeket tesemtem densema Lebanon south len tesem tuluka nungi nüburttem ainshitsü totuyuba agüja lir. Item tesem nung alirtem dang tangsa pei talidak tesem yutsür Zahrani River north leni aotsü ashia, koba Lebanon-Israel arütsü nungi kilometer 40 shi pilar lir.

Item totuyuba ya social media nung lemsatpeba nung ki kar nung temaitsü agütsür liasü, anungji tetsübo nung nisung meyrirang aika jenogo.

Tyre nung Israel-i tayimtsü amshia ammag-sangwa tsüngta amakdang ki ka aser café ka nung kongshia mi adok aser emergency crews temi nisung asü-amartem bushia liasü.

Israel mitkari Hezbollah "infrastructure" amak ta ashir, saka Israel-i aiben civilian tem alidak aser nisung aika aliba tesemtem nung maka arur.

Osangbener kati Tyre nungi jembidang, iba yimti nung tanen makai amaker ta ashia.

"Yasüng ayatirm nungi Tyre aser temeket tesem nung terben dak tema amakba lir," ta osangbeneri ashia.

"Yashi nüburttem yimti yutsür ainshia liasü. Iba yimti ya tuluba tazüng amai lir," ta pai ashia.

Israel-i tashiyim amshia nüburttem meindokba aser tanen makai urban centres amakba ajanga civilian tem lendong nung yutsür aser humanitarian crisis tamajungba akumer, ta International Committee of the Red Cross ajanga tekumdangtsü shiogo.

Ano osangbener kati Beirut nungi jembidang, taoba ita US tetsüngtai ia ceasefire yangluba ajanga azüdokshi mesoitteter, ta ashia.

United States tetsüngtai ia Israel aser Lebanon tsüngta Brehostibarnü jembishinü tenzükshitsü lia tensa tamajungba akumer.

Kasa mapang Israel-i tesüiba anogo ana tashi military operations kanga agi tesashiba inyaka yimjung asoshi teimla kangabo mangur.

## Kenya tetsür school ka nung mi agi kaketshir 16 rongset

**Nairobi, Monupii/May 28 (TYO):** Kenya linük tiyonglen tetsür indang school ka nung dormitory ka nung kitsük kirong lendong ataloka kaketshir 16 asü, ta police aser sorkar ketdangsür temi ashir.

Brehostibarnü Education Minister Julius Ogamba-i ashiba agi, Gilgil, Nakuru County kübok Utumishi Girls School nung yasüng mi adokba nung nisung 79 yiru.

Iba mi adokba tera ano mejangjateti lir.

Police temi jila nung rescue and emergency response mapa inyaker ta ashir, koba linük yimtiba, Nairobi nungi northwest tsütsü kilometer 120 shi pilar lir.

Citizen Television ajanga video prokshiba nunga window panes raksar aser jara nung mokozü agi menentsür aliba nguogo.

Iba mi jangruba mapang kaketshirtem jena oa alinungbo ta police 50 shi temeket tesemtem nung meita repranga

jajar, ta police tanishir Masoud Mwinyi-i iba lendong atalokba tesem nungi osangbener dang ashia.

"Taoksa aser tetsübo nung nisung aika kimai adok, aser iba ya aonung liasü," ta pai ashia.

Kenya nung school kidang kitsük-kirong lendong atalokba ya tang tasen masü. 2018 küm kisüng nunga punlic secondary schools rongdoktsüba ken o 60 dak tema liasü, ta sorkari indang data ajanga ashir. Item tatalokba ya aika ozüng tesashi aser school majungba anema longkak aitba kaketshir temi mi senloktsüba lir, ta research agir temi ngutet.

2024 küm anasa Nyeri County nung primary boarding school ka nung mi adoka kaketshir 21 rongseta liasü. Iba mi ya kechi ajanga adokar mejangjateti lir.

2017 küm Nairobi nung aliba school ka nung mi adoka kaketshir ter asü. Kaketshir ka anema nisung tepsetba ken o benoka lir.

## Iran aser US na tayimtsü amshia makteper, yimjung teimla mangur

**Dubai, Monupii/May 28 (Agencies):** United States-i Strait of Hormuz anasa Iranian drone operation ka maka aser Tir Donald Trump-i Tehran den tezüngzüktep meyanglu ta sangdongba sülen Brehostibarnü Iran-i Kuwait nung US air base ka amak.

Iba yagi April ita tetenzüklen sangdonga aliba ceasefire ya ita asem raraba tembangtsü asoshi tezüngzüktep ka kumdaktsütsü meranga jembishinü akaba nung tashi maitba sayur.

U.S. Central Command-i ashiba agi, US sepaitemi Iran nung drones pongu khazüka yok aser rongnendak Bandar Abbas yimti nung drone trok yoktsü aliba ground control station ka amak. Iba sülen Kuwait sepaitemia par linük leni

khaloktsüba ballistic missile ka anüglak nung lia raksatsü, kong US base tuluka lir.

"Item inyakyim ya kanga junga asadanger, defensive asoshi aser ceasefire shidak alitsü tebilemba nung lir," ta US ketdangsür kati osangbener dang ashia.

Islamic Revolutionary Guard Corps-ia Bandar Abbas airport anasa anepdang amakba US base ka nung tenük yoker amak aser ano kasaji inyakra telangzüba tali tesashiba agütsütsü ashia, ta Tasnim news agency ajanga ashia.

Kuwait-i par linük amakba aitsü aser Iran dang tangsa tensa tamajungba akumba anenang ta ashia.

Region ajungalen Muslim nung Eid al-Adha benjong

amungba mapang iba ya ataloker, kong US aser Israel nati February 28 nü nungi Iran amakba ajanga tetsüngta nung mejepeba linük aika lir.

Totzü jenjang tanaben temlokogo, kong US indang totzü tazü ya Bodhbarnü shilem pongu ajemba sülen ano shilem asem shi temlokogo.

Trump-i aiben rara tatem leni arur ta shia lir, saka Bodhbarnü cabinet senden ka alidang, pa jembishinü nung temulung masür aser US-i sanctions agientsü indang mejembir, ta osangbener dang shia liasü, koba Tehran-i akhangba tem rongnung ka lir.

Ita ka tsüngta Strait of Hormuz ajanga akhi ama rong senzütsü atema tezüngzüktep ka yanglutar, kong Iran aser Oan

lungjemer traffic ketdang asütsü ta Iranian state TV ajanga ashiba pai katitsü.

Linük katia iba tzü lenmang mazüoktsü, ta Trump-i ashia aser Oman amokmerener ama angateter. Oman den US ya küm aika mitkar aser rongsenketzüng tsütsü tesendaktep tajung lir.

"Shingai (strait) mazüoktsü. Ibai international waters lir aser Oman-ia ajaki ama yimya amshitsüla, mesüra onoki parnok poksatsütsüsa akumtsü. Parnoki aji angateta lir, parnok ajungtsü," ta Trump-i ashia.

Iran den külemi strait azüoktsü indang Oman-i kecha shia mali.

US ketdangsür temi amokmerenba asoshi sasa bilemstüba Tehran-i Oman den lemsatpego. Iran indang Revolutionary Guards temi iba tzü lenmang ya par meyong ama sayur aser tesüiba ghonda 24 tsüngta rong ana anendaktsü aser 26 ajanga odaktsü ta ashir. Rara metenzükdang iba tesem ajanga anogoshi rong 100 dak tema ajanga liasü.

Iran Supreme Leader Mojtaba Khamenei-i parliament dangi shiti ka züluba nung, iba rara ajanga Iran tashi itshio go ta ashia aser ozüng yanglurtem dang linük telungjem wazüka ayutsü, raksar aliba yanglushitsü aser timtem nung yaritepa, osettsüset nung jenjang tali akumba aser ochimashi mapa

azüoktsü ajungshi, ta state media ajanga ashia.

Tehran-i United States dang Iran nung sen salatsü nenshia ashir, ta par National Security Council nung deputy secretary Ali Bagheri Kani-i ashia.

Iran-isa US-i par rongnendak tesemtem nokdanga aliba lapoktsü, sanctions agientsü lenmang bushir, koba Iran indang Persian Gulf Strait Authority bendenloksemogo, ta US Treasury Department-i Bodhbarnü ashia. Persian Gulf Strait Authority ya strait ketdang asütsü atema Iran-i amenokba lir.

Rara metenzükdang international legal guarantees kübok iba tzü lenmang ajanga bendanger rong tem ayong-ayonga senzüa liasü.

Iran-i yimjung tezüngzüktep nungya temeket tesemtem nungi US sepaitem anizüker aotsü aser region nung US sepaitem indang ano jembitsü shia lir ta Iranian state TV ajanga ashir, koba White House-i tiazü ta ashia aser Tehran-i telangzüba magütsü.

Iran nungeri nuclear ken o ya ano anogo 60 agia jembitsü ta ashir, koba Trump bhukumer kari magizüker. Iran-i nuclear programme ya civilian asoshi kisüng lir ta ashir.

"Iran ket nung kodanga nuclear nok-nü malitsü, aser aji tatembang," ta U.S. Secretary of State Marco Rubio-i ashia.



Kinshasa, May 28 : DR Congo nung Ituri province kübok Bunia nung staff temi May 28, 2026 nü wara nungi jenbua alitsü aser azüoktsü oset tem belenba noksa nung angur. DRC nung Ebola cases ya 1,00 dak tema kumogo aser linük anüdoklen province tem nung maneni prokshia aor, ta ketdangsür temi ashir.

### ALI AYOKTSÜ LIR

Vihokhu village highway nungi minute 1 dang pilar  
Rs 80 per sq. ft. (Any size)  
Contact no. 8415081855

## Crystal Palace-i Conference League kokogo



**Monupii/May 28, 2026**

**(Agencies):** Oliver Glasner lenisüba nung Crystal Palace-i Bodhbar aonung UEFA Europa Conference League Final nung Rayo Vallecana goal 1-0 agi koka tang mezüngbuba Europe nung tongtumbang asayamung ka kokogo.

Leipzig indang Red Bull Arena nung final asayaba mapang goal ka ya Jean-Philippe Mateta-i idakja liasü. Adam Wharton-i metsüba ball ka Rayo goalkeeper Augusto Batalla-i junga menokdangteti meyiper adokba sülen Mateta-i idakja parnoki asaya koka liasü.

France nung striker atema iba goal ya tang asaya aliba season nung goal 16buba liasü aser pa atema iba goal idaktsüba ya Palace nungi asayaba mapang tang tashi

nung ajak dang tongtumbangtiba goal asütsü südi.

Glasner kübok Palace pur küm anaser tasadang kanga junga asaya aruba sülen tang iba takok ya ngutetogo, aser pa ya iba club indang manager tajungtiba ama club toktsütsü. Pa caoch asüba mapang Palace puri FA Cup, Community Shield aser tang European trophy ya kokogo, shirnoki asayamung ka danga koker maliasü.

Club anaprongla ya tang mezüngbuba European final ka nung asaya aser asaya tetenzüklen kanga kümdanga asayatep. Ajisüaka tanem tanemi Palace puri kanga junga asaya tenzük aser Mateta-i goal ka idaktsüba yagi parnoki asaya koka liasü.

Maneni Glasner kübok Mateta kanga junga asaya tenzükogo. Austria nung

coach ya 2024 küm February ita club nung maden tsüngda Mateta-i Palace nungi asaya 80 nung asayaba mapang goal 11 dang idaktsür liasü. Glasner kübok pai kanga junga asaya-asaya 110 nung goal 46 idaktsüogo.

Mateta ya January ita AC Milan-i aotsü sensaksema liasü saka pa temekok yiruba sülen iba sensaksem ya chirep.

Season tetenzüklen club nungi nüngtugu asayar Eberechi Eze Arsenal aser Marc Guehi Manchester City-i oaka Parnoki iba takok ngutetogo.

Asayamung akokba sülen Palace pur taruba season UEFA Europa League league phase nung asayatsü jangjaogo, kechiyong UEFA temzüng ozüng kübok Conference League akoker Europa League nung asayatsü ta shia lir.

## Union Minister of Youth Affairs & Sports Dr. Mansukh-i Shillong semdangtsü



**Shillong, Monupii/May 28**

**(Agencies):** Union Minister of Youth Affairs and Sports Dr. Mansukh Mandaviya-i anogo asem atema May 29 nungi 31 tashi Shillong semdangtsü. Pai youth affairs, sports infrastructure development dak senbdakba nung sentong balala nung shilem agitsü aser state nung centre-i senotsü teyari agütsüba scheme tem asadangtsü.

Shillong semdangba mapang Union Minister-i Department of Youth Affairs-i ayongzükba Chintan Shivir sentong nung shilem agitsü.

Meghalaya Sports and Youth Affairs Minister Shri Shakliar

Warjri aser tanga ketdangsertemia item sentongtem nung shilem agitsü. Kasa mapang nung Dr. Mandaviya-i, May 30 nü Shillong nung Meghalaya Chief Minister Conrad K. Sangma den külemi Integrated Multipurpose Indoor Sports Complex lapoktsütsü.

Integrated Multipurpose Indoor Sports Complex ya sen crore 132.9 entoka yangluogo. Iba ya basketball, badminton aser volleyball aser tanga kilung nung asayaba asayatem asayatetsüsa design süa yangluogo.

Iba complex ya National Games atema tongtumbang venue

ka asütsü, kong multipurpose halls, auditorium, banquet facilities amala integrated infrastructure tem densema lir.

39buba National Games 2027 Host State Contract ya Meghalaya den ketdangsur tejentem aser Indian Olympic Association nungi lenirtem matsüngdang sign asütsü.

Maneni Union Minister lenisüba nung 39buba National Games dak sendakba nung terenemshiba balala lepa reprangshiba senden ka amentsü.

Senden nung ken o balala metetdakttsü aser Meghalaya aser Northeastern state tem nungi lenirtem den sensaksem akatsü.

Shillong semdangba mapang Dr. Mandaviya-isa, Umsawli Sports Complex semdangtsü, kong aquatics aser tennis facility tem amenoka lir.

Union Minister-isa, May 31 nü Poorvottar Sampark Setu kübok Meghalaya nung Ri-Bhoi district nung Centre-i senotsü teyari agütsüba scheme tem asadangtsü.

## Singapore Open: Sindhu aser Sen na quarterfinals-i iogo

**Monupii/May 28, 2026**

**(Agencies):** India nung rongnung badminton asaya nung temaba jenjang nung aliba asayar PV Sindhu, Lakshya Sen aser tebur tarep asayar Satwiksairaj Rankireddy aser Chirag Shetty nung den tarep temeyoktep asayar Dhruv Kapila aser Tanisha Crasto nata Brehostibarnü Singapore Open nung quarterfinals-i iogo.

Sindhu-i Japan tsür Riko Gunji straight games nung akok aser Satwik-Chirag nati Lee Jhe-Huei aser Yang Po-Hsuan na 21-15, 11-21, 21-18 koka liasü. Dhruv aser Tanisha natia Japan nung tarep Yuta Watanabe aser Maya Taguchi na 8-21, 21-17, 21-16 agi kokogo.

Sindhu-i tetenzük nungi asaya amokbanger asaya aser minute 37 nung dang asaya koka liasü. La quarterfinals nung top seed An Se-young den asayatsü.

Kasa mapang nung tebur kija asaya nung Thailand nung asayar Kunlavut Vitidsarn point ana dang asayaba sülen yirur masayatetsüsa akümba ajanga

Lakshya Sen quarterfinals-i iogo. Lakshya taruba asaya Japan nung asayar Koki Watanabe den asayatsü.

Tebur tarep asaya nung fourth-seeded Satwik aser Chirag nati kanga junga asaya tenzük aser mezüngbuba game akok, saka Chinese Taipei nung tarep yagi tanabuba game koka decider asayatsüsa aküm.

Decider asaya nung India nung tarep yagi asaya 21-18 agi akok aser Huei aser Hsuan na den tashi tashi nung tenetben asayaba ajak kokogo. Tena quarter nung Malaysia nung tarep Kang Khai Xing aser Aaron Tai na den asayatsü. Taküm küm tetenzüklen All England Open nung tenati Taipei nung tarep ya mekoki liasü.

Tarep temeyoktep asaya nung mezüngbuba game mekokaka Dhruv aser Tanisha nati tanungba game ana koka quarter tongtetogo. Tena taruba asaya third-seeded Malaysia nung tarep Chen Tang Jie aser Toh Ee Wei den asayatsü.

## Barca-i Gordon atema £69m agütsütsü mulunga agizükogo

**Monupii/May 28, 2026**

**(Agencies):** Barcelona-i Newcastle United nungi England forward Anthony Gordon atema pound million 69 dak tema agütsütsü mulunga agizükogo.

BBC Sport-i taoba mapang iba asayar alizüktsü atema club ana yongtsü nung sensaksem tatembangleni arudar ta sangdonger liasü.

Tang club ana tsüngda Gordon atema euro million 80 dak tema agütsütsü atema (£69.3m) mulungtepogo.

Gordon ya World Cup matong tsüngda England team-mate tem den United States nung training camp ka atema mao tsüngda inyakyim tembanga inyaktüsü.

Bayern Munich-ia Newcastle den formal sensaksem ka agiogo, saka club ana tsüngda tenangzüktepba ka meyanglutet aser tang Barca-i pa atema Newcastle-i agizükttetsüsa bid süogo.

Newcastle chief executive David Hopkinson-i, March ita sangdong ka ajanga parnoki mulungba ama dang asayatem ayoktsü ta jangja jangja shir

liasü. Gordon ya kanga junga ayoktsü atema club jenjang kanga junga liasü, shiba den 2030 küm tashi atema tenangzüktepba yanglur liasü.

Premier League nung jenjang 12buba nung tembangba sülen Newcastle pur team yanglushitsü atema asayatem yoka alitsü nüngdaka kümogo.

Tang iba tenangzüktepba yangluba ajanga parnok nem transfer market nung sen entoktsü atema lenmang lapoktsüogo.

Gordon ayokba ajanga ajangzükba shilem 15 bo Everton nem agütsütsü lir. Everton puri parnok indang academy nungi anitetba asayar ya 2023 küm pound million 45 agi yoka liasü.

Newcastle nungi tongtumbang asayatem rongnung Gordon yagi club toktsütsü imla liasü, aser club nungi goal timtiba idaktsüba asayar ya club pur tatembangbuba asaya pezü nungbo masayadaktüsü, kechiyong head coach Eddie Howe-i tarutsü dak rangloker inyaksangshia liasü.

## BILEMDANGANG

**"Na temaba jenjang nung aliba mapang ner medemertemi naji shibar meteter, saka na tekübokba jenjang nung aliba mapang ner medemerji shibar jangjar."**